

Corporaziun Evangelica Zernez

Radunanza generala da marcurdi, ils 25 da mai 2021, a las 20:00h illa aula da la chasa cumünala a Zernez

Preschaints: 27 persunas cun dret da vuschar

S-chüsats: Riet Felix

Tractandas

- 1. Tscherna dals scrutinadurs**
- 2. Protocol da la radunanza generala a Zernez dals 7. october 2020**
- 3. Rapport annual dal president 2020**
- 4. Rendaquint 2020 e rapport dals revisurs da quint**
- 5. Credit da Fr. 16'000 per ün nouv sistem d' accustica per la baselgia San Bastian**
- 6. Chasa Pravenda Zernez: Dumonda per la cumpetenza da pudair trattar reguard
ün contrat da barat tanter il cumün da vaschins e la corporaziun evangelica**
- 7. Preventiv 2021 e 2022**
- 8. Fixar il pè d'impostas da la baselgia per l'on 2022**
- 9. Tschernas: Reelecziun dad üna commembra dal consistori Flurina Walter
Elecziun dad ün o üna revisur(a) da quint (proposta Manuela Bonifazi)**
- 8. Revisiun dals statüts da la corporaziun evangelica da Zernez – adattamaints a
ledschas superiuras nouvas**
- 9. Orientaziuns e Varia**

Bivgnaint dal president Hermann Thom a las votantas ed ils votants.

El surdà il pled a nos ravarenda Rainer Grabowski per üna cuorta meditaziun.

Meditaziun dal ravarenda Rainer Grabowski cun üna chanzun da Tese e no chantain insembel il coral nomer 12 accumpogna da Christa Pinggera.

Rainer piglia il pled e fa üna cuorta meditaziun sco chi vegn fat a Tese e chanta in connex cun Tese eir amo üna chanzun da la. Rainer giavüscha a tuots üna bella e buna radunanza cun bunas discussiuns.

A la fin da la meditaziun dudin nus il coral nomer 12 suna da Christa Pinggera al clavazin ed accumpognà dal chant dals preschaints da la sezzüda.

1. Tscherna dals scrutinadurs

Il president propuona da tour sco scrutinadurs a Margaritta Fili ed a Esther Christoffel ellas han tuottas duos üna plazza cun buna survista sur da tuot ils votants.

2. Protocol da la radunanza generala a Zernez dals 7. october 2020

Il protocol nu vain plü prelet el es stat expost in differents lös ed eir sülla pagina dad internet da la corporaziun evangelica. Il protocol vain fat bun sco expost sainza cuntravusch.

3. Rapport annual dal president 2020

La radunanza piglia cogniziu dal rapport dal president. Il president Hermann Thom prelegia seis rapport annual:

Charas preschaintas, chars preschaints

Nus vain be güsta discus - e fat bun, il protocol da la radunanza generala dals 7 october dal 2020. Insè esa dimena be ün mez on daspö l'ultima radunanza generala.

*Causa cha a quella vaiv eu rapportà in meis rapport presidial bler sur da la vacanza da ravarenda cha no vaivan gnü e sur da l'andamaint dad ün on special fingià avant corona, lessa quista vouta cumanzar eir ün pa avant co pro l'ultima radunanza generala e rapportar dad ün on special causa corona. I d'eira venderdi, ils 13 da marz dal 2020. Quel di vaiva il cussagl federal annunzchà il prüm lockdown chi cumanzaiva il lündeschdi a bunura. Quel di n'haja gnü üna sezzüda cun genituors e confirmands, üna cuorta sezzüda culs preparands da quella vouta chi intant sun eir fingià confirmats ed üna sezzüda al telefon cullas commembraas dal consistori. Nus vaivan gnü da sdir giò il di da schoppa e la confirmaziun. Ed i redschaiva üna malsgürezza **immensa**. La dumengia, als 15 da marz vaina lura - per lung temp gnü l'ultima predgia in nossa raspada.*

Dürant il temp da malsgürezza sainza contacts socials, vaina provà da mantegner in alch maniera il contact culla glieud, cun far üna ediziun speciala da nossa gazettina «La Punt» per Pasqua. Id es per part gnüda scumpartida schoppa chi nu d'eira gnüda dovrada pel di da schoppa e per part d'eiran gnüdas scumpartidas tratschoulas cha nossa Otilia vaiva fat per dar a la glieud. Ed eir per Tschinquaisma vaivan fat üna ediziun speciala da «La Punt», -ma intant vain quel di darcheu pudü cumanzar cun predgias.

*Precis in quel temp es nos ravarenda Rainer Grabowski rivà ün venderdi saira cul tren e be cun üna valisch cun büschmainta a Zernez. Sia famiglia vaiva pudü gnir pür ün mais plü tard, pervia da restricziuns pro tuot ils cunfins. El ha gnü ün cumanzamaint na uschè simpel in ün lö cun cultura, cun üna lingua e cun tradiziuns per el estras. El fa seis pussibel per **rivar ed as plachar** adüna meglider pro nus e nus fain nos pussibel per cha el e sia famiglia as chattan aint ed as chattan plan a plan eir da chasa qua in nossa raspada.*

Dürant la stà passada ed ir ün toc aint per l'utuon vain lura pudü listess amo far sper ils solits cults divins, eir ün o tschel arrandschamaint ün pa special. Uschè vain gnü aint in Brail l'apero da salüd per nos ravarenda, nus vain fat il cult divin champester illa ruina da la baselgina da Gonda, insembel culla raspada dad Ardez-Ftan-Guarda e nus vain pudü far il cult divin ecumenic per la festa federala cun apéro aint il curtin da la baselgia catolica a Susch.

Nus vain lura amo be güsta pudü far la radunanza generala al cumanzamaint d'october e fìngià ha darcheu cumanzà il sdir giò, müdar e modifichar tuot. Cumanzà vaiva fìngià cun la festa da la racolta, cha nus vain per ün on stuvü far sainza partecipaziun d'uffants, ma cun partecipaziun da giuvenils - e lura vain spostà il viadi da confirmands sün x ünsacura. Uossa vegn quel lura fat davo la confirmaziun, pür in lügl da quist on. Quai chi'd es in alch maniera stat pussibel da far, vaina fat cun ün pa fantasia in versiuns restrettas. Ma nus vain listess fat cults divins d'Advent cun partecipaziun da preparands e da confirmands, nus vain gnü ün cult divin da Niculaus, nus vain fat soncha tschaina in ün möd ün pa stran, ma na laschà davent dal tuot - e nus vain fat ün cult divin da Chalandamarz e di da schoppa.

Davo cha nus vain fat eir quist on üna sezziùda cun genituors e confirmands üna saira sün baselgia San Bastian, han quels decis da far la confirmaziun a la dumengia da las Palmas eir scha nus pudaivan pensar cha las ustarias füssan sgüra amo serradas quel di - ed eir scha nus vain stuvü sparpagliar tuot sün trais baselgias pervia da la restricziun da 50 partecipants per ün cult divin.

Nus vain lura eir cumanzà a chantar, subit chi'd es darcheu stat permis, eir schi'd es da laschar sü la mascrina per chantar. Nus vain in mincha cas imprais ad esser flexibels ed avair fantasia ed improvisar cur chi fa dabsögn. E l'on es passà eir uschè.

*Nossas confirmandas e noss confirmands sun eir stats flexibels e han gnü bler'incletta per la situaziun. I sun stattas **quist on** duos confirmandas e 3 confirmands. Implü vaina gnü l'on passà duos battaisems. Quist on sun previs daplüs – eir da quels cha l'on passà sun gnüts spostats. Eir nozzas vaina gnü üna chamestra a Zernez ed a Lavin üna in baselgia be cuort davo nossa radunanza generala l'on passà in october. Otras sun gnüdas spostadas e gnaran fattas quist on.*

Funarals vaina gnü daspö l'ultima radunanza generala 4. Dafatta pro'ls mortoris haja però dat da quels chi han tgnü a chasa l'urna e chi forsa fan lura plü tard listess amo üna sepultüra cul ravarenda. Oters han decis da far eir quai be tanter dad els, causa cha tuot d'eira ün pa difficil cun quista corona.

Tuot in tuot am para cha nus vain tuots ans randschats tant inavant e fat quai chi d'eira pussibel, ma la cumünanza ha listess pati! Perquai m'allegra propcha sün temps, ingio cha nossa cumünanza po darcheu gnir cultivada meglider.

*Davo ün **on uschè** esa da cumanzar culs ingrazchamaints pro tuot las commembras ed ils commembers da nossa raspada. Grazcha per l'incletta scha adüna tuot nun es i sco adüna - e sco chi's vess forsa giavüschà.*

*Grazcha fich fichun però a tuottas e tuot quels chi s'han ingaschats **per nossa raspada** e nossa cumünanza e per cha tuot ha listess amo funcziunà tant inavant.*

Grazcha fichun a nos ravarenda, Rainer Grabowski, eir per sia incletta e per sias staintas da'ns far tuot a dret - eir scha per el es bler vaira ester. Grazcha eir als ravarendas chi sun gnüts a güdar oura.

*E grazcha eir a tuot las impiegadas ed impiegats pro nossa raspada chi muossan bler ingrazchamaint eir amo sper lur impiegis e stübgian **eir els** adüna che chi manca e che chi's stuves forsa amo far.*

Grazcha a tuot quels chi güdan adüna pro a la reuschida da tuot quai cha no organisain saja quai cun far schoppa o cun güdar qua o là spontanamaing per chi funcziuna.

*Grazcha fich **a meis consistori!***

E per finir grazcha per la cumünanza cordiala cha vus e nus eschan buns da fuormar tanter pér.

Grazcha fich a Tuots.

4. Rendaquint 2020 e rapport dals revisurs da quint

Hermann da il pled a Claudia Duschletta ella preschainta il quint da gestiun ed il bilantsch per l'on 2020 e declera divers detagls. Il quint da gestiun da la raspada serra cun üna perdita da 113'149.16 CHF. Claudia declera il motiv da la perdita, quai ha da chefar cul müdamaint co chi vegnan pajadas oura dal cumün politic las entradas d'impostas, fina uossa gnivan pajadas dal cumün las impostas facturadas, nouv vegnan pajadas inavant a la corporaziun evangelica be quellas impostas chi sun effectivamaing entradas pro'l cumün. Displaschaivelmaing nu'ns vaiva il cumün politic infuormà uschè bod chi's vess pudü metter quist müdamaint aint il preventiv. A Claudia displascha fich da stuvair serrar giò il rendaquint cun quista gronda perdita.

La facultà nouva da la raspada as summa per la fin da l'on 2020 a 894'961.58 CHF inclusiv contos specials.

Hermann as ingrazcha pro Claudia e disch cha eir ad el displascha fich cha Claudia davo 25 ons avair fat la contabilità sto serrar giò uossa uschè, ma cha oramai sia uossa da far il tag per far quist müdamaint e ningün nu s 'impo da quai.

Hermann da il pled ad Esther Christoffel.

La revisura Esther Christoffel legia avant il rapport dals revisurs da quint. Seis collega Riet Felix as ha s-chüsà per la radunanza. I'l rapport es scrit cha tuot es in bun uorden e manà tenor las pretaisas. Ils revisurs da quint propuonan dad approvar il quint e da dar dis-charg als organs responsabels. La radunanza segua a quella proposta sainza cuntravusch.

Cun quai cha Claudia Duschletta sco bain Lucrezia Schorta Thom han demischiunà as ingrazcha Hermann amo üna jada pro Claudia e tilla surdà üna flur per tuot sias lavurs prestadas, cha no eschan fich grà. Eir pro Lucrezia Schorta Thom as ingrazcha Hermann per tuot sias fadias davo passa 10 ons e tilla surdà ün regal ed üna flur.

5. Credit da Fr. 16'000 per ün nouv sistem d' accustica per la baselgia San Bastian

La baselgia San Bastian a Zernez ha fich üna noscha accustica, no vain tschüf adüna darcheu differentas reclamaziuns chi nus doda il ravarenda o chi nu gnia inclet inguotta. Uschè cha no vain decis chi sto gnir müda qualchosa, Hermann ha fat gnir a duos accusticers per laschar verer la situazion e per laschar far üna offerta. Quels duos homens chi sun lura gnüts sun da la firma chi ha eir fabricha aint l'acustica illa baselgia da Susch.

Els han eir constatà cha'l sistem d'acustica es fingià fich vegl quai voul dir tanter 40-50 ons vegl, cha la baselgia ha ün rebomb enorm ferm e quai be fingià sainza

amplifichadurs. Els han lura spiegà a Hermann differentas tecnicas modernas chi füssan pussibel da fabrichar aint e chi's dudis lura meglider. No vain lura surgnü duos offertas üna per 16'000.00 CHF ed üna ün pa plü bunmarchada. Aint in quella da 16'000.00 CHF esa aint eir amo l'installaziun dad ün fil chi passa aint il fuond per tuot quels chi han ün apparat da dudir, uschè cha quels survegnan l'ura directamaing ils segns acustics, e dudissan lura sur quel fil eir, cler e bain.

Fat gnissan las lavurs lura cun ün electriker da quia ed ils apparats electronics ans tramettess lura quella firma dals accusticers chi sun stats a verer la situaziun.

Hermann dumonda scha inchün ha amo dumondas o scha no possan far bun il credit da 16'000.00 CHF per' l nouv system d' accustica?

Jack as annunzcha, el ha amo differentas dumondas e as giavüscha ün per puncts cha'l's nouvs mez electronics vessan dad accmplir.

Hermann respuonda a sias dumondas e disch cha la gronda part da seis giavüscher sia cumprais aint in quella offerta.

Il contrat da service, quai vaina fingià ün per la baselgia da Susch pel s-chodamaint e l'acustica e quels surpigliessan eir tuot quai da la baselgia a Zernez uschè cha la nu füssa da far nöglia da nouv.

La radunanza fa bun il credit da 16'000.00 CHF.

6. Chasa Pravenda Zernez: Dumonda per la cumpetenza da pudair trattar reguard ün contrat da barat tanter il cumün da vaschins e la corporaziun evangelica

Hermann es statt plüssas jadas a radunanza dal cumün per as metter aint per renovar la chasa pravenda. La chasa pravenda tocca al cumün da vaschins, il cumün politic ha ün usufrüt da la chasa pravenda e no vain il dret da tour a fit quella per 60 ons. Da quels 60 ons sun uossa passats pür 20 ons. Id es bun cha no das-chain tour a fit ma i füssan eir da far renovaziuns e dad investir raps. Il cumün ha lura üna jada manzunà cha els vessan interessents per vender la chasas pravenda e cha els dessan a no üna abitaziun simla pel ravarenda. No vain lura stübgia differentas pussibiltats ed eschan gnüts sül idea chis pudess far ün barat, cun quai cha no vain amo l'abitaziun a Lavin chi'd es sül seguond plan ingio cha tuot il plan suot tocca al cumün, no vain eir amo differentas parcellas da prada a Lavin, ingiò cha'l's fittadins füssan per part eir interessats da tillas cumprar. Uschè chis pudess cumprar la chasa pravenda a Zernez e vender quella abitaziun a Lavin e las parcellas uschè cha vessan lura amo da tour sü ün credit da var 300'000.00 CHF. Per cha quist tuot füss pussibel vessan da gnir il prüm ad ün contrat per til lura far bun illa prosma radunanza generala. Hermann dumonda scha inchün ha amo dumonda e scha la radunanza füss perincletta culla proposta?

Letizia Brot as annunzcha e disch cha ad ella paress quai fich üna bona idea.

Hermann manzunna cha uschè as pudessa lura eir ir in tschercha da raps per far differentas renovaziuns vi da lura nossa chasa, quai es bler plü simpel sco scha ella nu tocca a la baselgia.

A Not Filli para quai eir fich üna buna idea ma i füss flot da savair amo ün pa plü precis las cifras lapro.

Hermann manzunna cha per'l mumaint vaja be per savair scha tuots füssan perinclets per dal l'incumbenza da far il barat.

La radunanza vuscha giò da schi, Hermann as ingrazcha fich per la fiduzcha.

7. Preventiv 2021 e 2022

Cul nouv system da contabilità nun esa plü pussibel da far bun in preventiv pür davopro, la stol gnir fat ouravant, uschè cha no vessan da far bun el ün on ouravant o bain far duos radunanzas generals be per far bun plü tard il preventiv. Uschè cha no vain decis da propuoner da far bun el ün on ouravant a la radunanza generala chi ha adüna lõ prümavaira.

Claudia Duschletta preschainta il preventiv per' l'on 2021 e eir quel per l'on 2022, e sta a disposiziun per dumondas. Ils preventivs per ils ons 2021 e 2022 veggan approvats unanimamaing.

8. Fixar il pè d'impostas da la baselgia per l'on 2022

La proposta dal consistori es quella da laschar il pè d' imposta sco fin qua, pro 18.5% da l'imposta simpla dal chantun Grischun. Quel as metta insembel da 15% imposta da baselgia per la raspada e 3.5% imposta per l' equalisaziun chantunala. La proposta vain approvada da la radunanza cun unanimità da vuschs.

7. Tschernas:

Reeleciun d'üna commembra dal consistori Flurina Walter

Flurina Walter es uossa fingià traïs ons il consistori e sto cun quai gnir reeletta. Il president dumonda schi dà amo otras propostas o scha inchün es pront da far la proposta da far l'elecziun sainza scrutin? Ottilia Godly as annunzcha e fa la proposta da far sainza scrutin, e tuot ils preschaints sun perinclets.

Flurina Walter vain reeletta da la radunanza cun unanimità da vuschs e cun applaus. Flurina as ingrazcha pro'l preschaints.

Elecziun dad ün(a) revisur(a) da quint (proposta Manuela Bonifazi)

Il consistori ha tscherchà ün(a) candidat(a) per revisurs da quint. A disposiziun as ha miss Manuela Bonifazi per quist post avert.

Hermann fa eir quista jada la dumonda davo ulteriuras propostas per candidats o scha inchün es pront da far la proposta dad eleger sainza scrutin? Ottilia Godly as annunzcha e fa la proposta da far sainza scrutin, e tuot ils preschaints sun per inclets.

Eir Manuela Bonifazi vegn eletta da la radunanza cun unanimità da vuschs e cun applaus. Manuela as ingrazcha pro'l preschaints.

8. Revisiun dals statüts da la corporaziun evangelica da Zernez – adattamaints a ledschas superiuras nouvas

Il president declera perche cha'ls statüts ston gnir suottamiss ad üna revisiun. La proposta per üna nouva constituziun da la Baselgia chantunala es gönüda approvada ed intant es gönüda constituida eir la Regiun da baselgia chi rimplazza il Colloqui. In quel sen ston gnir fats müdamaints vi da differents artichels da nossa constituziun per adattar quels a las nouvas ledschas superiuras. Müdamaints daja vi dals artichels 3, 10, 13, 14 e 21.

Davo muossa el cul beamer che chi sto precis gnir müdà giò in che artichel uschè cha minchün vezza amo üna jada ils differents müdamaints.

Our da la radunanza nun ha ingün pretais scrutin, uschè chi po gnir vuschà giò avert.

Il president dumonda scha no approvain ils differents singuls müdamaints dals statüts? I vain vuschà giò unanimamaing per approvar ils statüts.

9. Orientaziuns e Varia

Hermann Thom orientescha sur dals tocs terrains chi toccan a la baselgia giò Lavin. Güsta cuort davo chi'd es statt oura la Bannida es gönü la dumonda da la Vifier Retica scha els das-chessan dovrar ün toc da nos terrain dürant la fabrica dad üna halla pel tren das pumpiers dal Vereina. Hermann manzuna cha quai nu saja uossa il problem, il problem es cha ün di davo ha Hermann surgnü ün telefon dad Ursina Fried chi ha manià cha quai nu sia üna buna idea da fabrichar davant Lavin sü quista gronda halla dad 80 meters e cha no dessan far il bain e spettar cun dar a la Vifier Retica il permiss chi possan dovrar il terrain dürant la fabrica. Ella less jent far autras propostas a la Vifier. Hermann ha dit cha quai sia bun cha no sian perinclets cun spettar per dar il ok a la Vifier.

Be d'incuort han eir surgnü tuot las chasadas il flyer da la not lunga das las baselgias, il president orientescha ün pa che cha quai es e che chi vegn tuot fat la.

Jack Pinggera ha amo differentas dumondas a regard il plan da predgia, el dumonda schi nus pudess far ün plan da bod e tard e schi nu füss pussibel a Zernez da far mincha dumengia predgia?

Hermann respuonda cha a Zernez esa uossa fingià trais o quatter jadas predgia al mais, a Susch ed a Lavin esa duos jadas al mais ed a Brail esa quatter jadas l'on, id es uossa fingià bel e bain resguardà cha Zernez es la plü gronda fracciun dal cumün da Zernez. El spiega eir amo per tuots quanta lavour e quant stübgjà oura cha uschè ün plan da predgias es e sco chi'd es fabrichà sü il plan da predgias ed eir amo sco chi sun parti sü las predgias dürant tuot on sün tuot ils cumüns. In mincha cas nun es quai uschè üna simpla roba e no vain quai stübgjà bain e chi va sü per tuots da maniera güsta. Da plüssas predgias in ün lö nun esa pussibel da far uschinà esa da strichar quellas in oters lös, perche far in general daplüssas predgias surpassess il quantum da predgias cha la baselgia chantunala prevezza per üna raspada sco nocssa.

Il president dumonda scha uschinà inchün ha amo alch suot varia? Ningün nus annunzcha plü.

Christa suna il coral final per nossa radunanza generala e no chantain insembe „La glüna es alvada“.

Eir quist on nun esa displaschaivelmaing na pussibel da far ün aperitiv davo la radunanza generala.

La radunanza po gnir serrada a las 21:45h

Rainer Grabowski preschainta davo quella amo il viadi cha el farà lura d'instà culs confirmands a Hamburg.

In buna fai, l'actuara Flurina Walter.